

## Flerschem om Taunus?

Gestern habb ich in de Erzberjerstrooß enn Bekonnte, de Alfons, getroffe, enn eschde Flerschemer. No, wo machsden hie?, habb ich den gefroocht.

Ei, hotter zur Ontwort gewwe, ich will grademol in die Flerschemer Zeidung. Waaßde, ich habb heit enn Brief aus Rostock kriecht. Doodrin war moi Lohnsteierkart, unn wie ich uff de Absender guck, hott mich die Wut gepackt. Unn doo habb ich gedenkt, dess muss die Zeidung wisse. Hier, willsde emol gucke? Doo reechsde dich aach uff!

Unn tatsächlich, uff dem Umschlaach hott als Absender gestonne: *Gemeinde Flörsheim am Taunus!*

Ich habb villeicht enn Schreck kriecht!

Was iss?, frächt mich de Alfons.

Alles Sache mettem Fluchhafe unn dem Fluchlärm, habb ich geschennt, doo siehsde emol, was die mett uns mache wolle. Die wolle Flerschem uffkaafe, dem Erdboddem gleich mache unn uns on de Taunus umquardiern, dess iss alles schunn ferdisch, unn jetz kimmts eraus. Mir kumme hinner Eschborn, doo hawwe merr koon Fluchlärm unn doo dun merr in Zukunft dess Maul halle unn nit alls mett dene in Wissbade erumkrät-sche. Alles schunn ferdisch, alles schunn ferdisch. Unn wenn ich dann sunndaachs on die Wart odder uff die Wissemiehl will, muss ich mettem Audo fahrn. Bei dene Spripreise, Himmel noch emol!

De Alfons schittelt de Kopp. Ei Honnes, glaabsde nit eher, dass dess enn Fehler iss mett dem Flerschem om Taunus?

Naa, habb ich gesacht, so Fehler gibts heit nimmi. Egal wo ooner sitzt: Wenner so was schreibt, dann schickt der dess mett I-Mehl onn den der so was drucke soll, der mächt enn Prowedruck unn schickt den zur Korrektur zurick, der Schreiwur guckt sichs oo, gibts frei oder korrigiert unn schickts genehmischt per Mehl zurick. Naa, so Fehler basiern heit nimmi. Die Herrn wolle uns umquardiern!

So, sacht de Alfons, jetz mach ich ab in die Zeidung. Unn egal wies iss, nächstjohr muss dess widder richdisch geschriwwe wern. Unn aach wenn dene, die erst in de letzte Johrn nooch Flerschem kumme sinn, dess egal iss: Mir alte Flerschemer wolle als Absender hawwe: *Stadt Flörsheim am Main*. Schließlich hott e gonz Generation vor uns ferr die Stadtrechte unn ferr dess *am Main* long genuch gekämpft.

Eiern Honnes